



kat.komc


53364

I Mag. St. Dr.

P

*Typus Philosophiae naturalis duodecim
assertionibus illustratus.*

J. H. de V. de V.



TYPUS
PHILOSOPHIÆ
NATURALIS

per Petrum Smutal
DVODECIM ASSERTIONIBVS
ILLVSTRATVS.



53369
1

P Rincipia Entis Naturalis (quod prout est Principium mobilitatis, esse Obiectum Philosophiæ Naturalis asserimus) sunt bene definita ab Aristotele, quod scilicet sint ea quæ non sunt ex alijs, nec ex alterutris, sed omnia ex ipsis.

II.

EX his primum est Materia prima, quæ licet ex se habeat Actum Metaphysicum, seu differentialem, non habet tamen Actum existentialem, etiam de potentia Dei absoluta, sed illum emendicat à Forma, ad quam siue ut absens, siue ut præsens, habet appetitum desiderij vel complacentiæ.

III.

Materia primæ tanquàm compars illius succedit Forma substantialis, quæ duplex manens simul & semel vnam numero Materiam, etiam de potentia **D E I** absoluta informare non potest; & licet vt materialis est, educatur de potentia Materia, vt tamen immaterialis est, nullo modo educi potest.

IV.

Loquendo de principijs Entis naturalis in fieri, tertium principium est priuatio quæ principiando non per suum non esse quomodocunque explicetur, sed per vltimum esse conuenit in ratione principij, cum Materia & Forma non vniuocè sed analogicè, analogiâ sc. proportionalitatis.

V.

DE toto composito Physico hoc sentiendum est quod constatum ex Materia & Forma tanquàm ex partibus essentialibus unitis non medio aliquo nexu, sed seipsis, non distinguatur realiter, sed solum ratione ab illis.

VI.

PRæter causas intrinsecas Materialem sc. & Formalem, quarum ratio constitutiva in **A**ctu primo ad causandum est propria illarum Entitas, dantur aliæ duæ causæ Extrinsecæ Efficiens sc. & Finalis.

VII. De

VII.

DE causa efficienti si sit principalis hoc tenendum est, quod pro principio proximo & immediato habens Formam accidentalem, & duplex numero manens, vnum & eundem numero effectum producere nequit.

VIII.

CAusa efficienti in causalitate contraponitur causa finalis, quæ cum non aliter nisi mediâ bonitate reali moueat, attrahat, & alliciat Voluntatem, ipsam solam pro ratione formali constitutiuâ in Actu primo ad causandum habet apprehensione tantum per modum conditionis sine qua non, deseruiens.

IX.

Actio formaliter transiens quam distingui à motu, qui est Actus Entis in potentia, secundum quod in potentia, realiter, modaliter asserimus; subiectatur in passo tanquam in subiecto.

X.

Infinium in Actu, quod ex propria ratione secundum id quod Actu includit, nullis clauditur terminis, tam secundum magnitudinem quam secundum numerum aut intensiorem, non solum naturaliter, verum etiam supernaturaliter dari nequit.

XI.

Licet passibile sit duo Corpora supernaturaliter existere in vno
& eodem loco, impossibile tamen est, vnum & idem Cor-
pus manere circumscriptiuè in pluribus locis.

XII.


IN Continuo dantur indiuisibilia tam terminatiua quam copu-
latiua, quæ sunt Entia realia positiua actu existentia realiter,
tanquam res à re, inter se & à partibus distincta.

XIII.

Loquendo de rebus permanentibus incorruptibilibus, hoc illis
attribuendum est quod non solum absolute, sed etiam serua-
tâ earum naturâ potuerunt esse ab æterno.



TYPVS



TYPUS
LIBRORVM
DE
ANIMA
DVODECIM THEOREMATIBVS
ADVMBRATVS.

I.

ANima quæ est Actus primus Corporis Physici organi-
ci potentia vitam habentis adæquate diuiditur, in Ani-
mam Vegetatiuam, Sensitiuam, & Intellectiuam, suo
modo tanquam Genus in Species.

II.

PRout se explicat in Anima rationali est indiuisibilis & con-
tinet Animam vegetatiuam & sensitiuam quoad gradus ve-
getatiui & sensitiui formaliter eminenter id est deemptis imper-
fectionibus.

B 3

III. Poten-

III.

Potentia illius quæ communiter numerantur quinque vegetatiua sc. Sensitiua, Locomotiua, Appetitiua, & Intellectiua distinguuntur realiter, ab ipsa Anima, habentque suam unitatem & distinctionem formalem, ex unitate & distinctione formali Actus & Obiecti.

IV.

Descendendo ad Animas in particulari prima inter illas est Vegetatiua quæ insistendo Doctrinæ Aristotelis est principium generandi tale quale ipsa est habens potentias operatiuas tres, realiter inter se distinctas, Nutritiuam sc. Augmentatiuam & Generatiuam.

V.

Animæ vegetatiuæ succedit sensitiua, quæ præter quinque potentias extrinsecas, Visum sc. Auditum, Gustum, Tactum, & Odoratum, habet quatuor interiores, realiter inter se distinctas, Sensum sc. communem, cuius munus est discernere inter sensibilia, à diuersis sensibus externis cognita, Phantasiam, seu Imaginatiuam, Estimatiuam, & Memoriam.

VI.

Vltima inter illas perfectione tamen prima est Anima rationalis, quæ ex propria sua ratione habet quod sit purè Spirituális, incorruptibilis, immortalis, per se subsistens, unita Corpori, per modum Formæ substantialis.

VII. Intelle-

VII.

Intellectus agens qui est potentia Animæ rationalis distincta realiter ab intellectu possibili, habet simul cum Phantasmate concurrere in genere causæ efficientis, principalis ad producendam speciem intelligibilem in intellectu possibili.

VIII.

Objectum proportionatum Intellectus nostri, pro hoc statu unionis ad Corpus est Quidditas rei sensibilis, pro statu vero separationis est Quidditas spiritualis propriæ substantiæ seu ipsa Anima rationalis à qua intellectus dimanat.

IX.

Species impressa in Esse intentionali & representatio est formalis similitudo sui objecti concurrens actiue cum potentia cognoscitiua ad cognitionem illius, formaliter & directe solam Naturam Materialem, indirecte verò, & per quandam reflexionem singularia representans.

X.

Intellectio quæ nihil aliud est quam habitudo intelligentis ad rem intellectam est distincta à verbo realiter tanquam res à re, reponibilis in Prædicamento non Actionis sed Qualitatis.

XI.

Licet omne intelligens eo ipso quod intelligens producat verbum mentale aut ex indigentia quia sc. obiectum non redditur à seipso intellectum in Actu secundo, aut ex fecunditate, non est tamen necesse quod omnis intellectio, ex quo intellectio, sit formatiua verbi mentalis.

XII.

Supposito Intellectu datur in substantia intellectuali Voluntas distincta realiter ab illo, quæ licet sit nobilior potentiâ pro hoc statu comparatiuè ad obiecta immaterialia superiora nobis, absolute tamen & simpliciter est ignobilior.

XIII.

Inter istas duas potentias talis est subordinatio quod vnamoueatur ab alia, vtraque autem à supremo Motore, DEO.

**CVI SIT HONOR ET GLORIA IN
ÆTERNA SÆCVLA, AMEN.**

*Disputabuntur publicè ad AEdes Sanctissime TRINITATIS,
sub presidentia R. P. F. THOMÆ SCHMITH Philosophiæ
Professoris & Nouitiorum Magistri.*



Biblioteka Jagiellońska



stdr0025914

